

清光緒朝中日交涉史料

卷五五之卷五六
二十六年

清光緒朝中日交涉史料卷五五

(三九〇五)北洋大臣裕祿等奏陳激勵諸軍誓圖進取義和團萬不可恃摺

光緒二十六年六月二十八日

革職留任北洋大臣直隸總督奴才裕祿幫辦北洋軍務太子少保四川提督奴才宋慶跪奏爲懷遵諭旨激勵諸軍誓圖進取並聲明義和團民早經逃散萬不可恃緣由恭摺仰祈聖鑒事竊奴才等於本月二十四日承准軍機大臣字寄二十三日奉上諭前因天津失陷當經降旨將裕祿等分別懲處未卽從重治罪原冀該督等自知愧奮振刷精神亟圖恢復乃數日來坐困偏隅一籌莫展朝廷寬典豈能屢邀耶裕祿疆圻任重亟應聯絡各軍並將水會民團重加整頓尅期規復天津若再遲廻觀望坐失事機自問當得何罪宋慶夙著勤勤馬玉崑平日亦稱奮勇此次連日力戰因傷亡過多退守北倉尙非畏葸無能豈可一蹶不振致負國家委任之重現在敵氛正熾該提督等亟當激勵諸軍力圖進取切不可再事遷延致干重咎將此由六里加緊各諭令知之欽此恭讀之餘彌殷惶悚仰蒙寬大之恩不卽加誅奴才等苟有天良當如何感激圖報伏念奴才慶到津後會同奴才裕祿聯絡各軍分路進勦晝夜不停欽奉諭旨聯絡義和團民當將其頭目張德成曹福田加意撫循約其

相助乃該團野性難馴日以讎教爲名四出搶掠並不以攻打洋兵爲心而教匪亦乘間效其裝束以紅黃布裹首混迹城鄉暗埋地雷無從分辨十七日交戰之先約彼相助乃藉口時尙未至或云日干不利任意推諉已非一次卽至進戰大軍奮勇直前忽四處地雷轟發十數里內木石橫飛天地變色當是之時義和團已不知去向且值居民驚避之際或掠良家財帛或奪勇丁槍械甚至搶劫衙署焚燒街市事後則解去紅布逍遙遠避其素稱爲團首者迄今多日終未見來逃遁無蹤無從再爲整頓奴才等所部各軍肉薄攻堅爲日已久所損精銳太多力不能支是以暫退北倉養蓄精銳稍爲布置再爲設法前進斷不敢觀望遲廻自貽罪戾除督飭浙江提督臣馬玉崑確探嚴防激勵將士設法進取外理合恭摺馳陳伏乞皇太后皇上聖鑒訓示謹奏光緒二十六年七月初二日奉硃批另有旨欽此

(三九〇六)軍機處寄前直隸總督裕祿等上諭

光緒二十六年七月初二日
上諭檔

軍機大臣字寄前直隸總督裕祿辦北洋軍務四川提督宋光緒二十六年七月初二日奉上諭裕祿等奏遵旨激勵諸軍誓圖進取一摺天津爲敵人所踞已及半月非激勵諸軍急圖進取恐敵人布置周密更難規復宋慶老於軍事該督務與熟商妥籌謀定後動斷不可

遷延觀望致誤戎機各省援兵陸續將到該督等當相度機宜督飭各軍穩慎前進力圖恢復是爲至要至聯絡義民及水會人等係地方官之專責裕祿身任兼圻旣不能聯絡於前用其死命復不能招徠於後任其渙散裕祿著傳旨嚴行申飭仍著該督迅速招集妥爲駕馭以輔兵力之不足倘仍飾詞推諉斷難逃朝廷洞鑒也將此由六皆里加緊各諭令知之欽此遵旨寄信前來

(三九〇七)致英國使臣寶納樂函

光緒二十六年七月初三日
洋務檔

徑復者接展初二日手緘閱悉一切前商各國大臣出京暫避原因京城人心浮動莠良錯出防不勝防而當此炎暑之時貴大臣等兀坐館中竊恐不免抑悶是以勸令暫離此地庶幾起居便適並非彼此有嫌致不接待可比此意必蒙鑒諒至由京至通州自當預備車轎由通州至天津自當預備坐船並將食物一切隨宜備帶總以適意爲主一面擬揀派總兵孫萬林挑選隊伍並調派提督宋慶之軍水陸兼行妥爲護送大致如此仍請貴大臣與各國大臣會同斟酌於前數日示以行期以便次第料理緣承詢及謹以奉覆順頌時祺慶親王等同啓七月初三日

(三九〇八) 山海關副督統富順奏報辦理防務情形摺

光緒二十六年六月二十九日

頭品頂戴山海關副都統奴才富順跪奏爲恭奉廷諭欽遵辦理緣由恭摺由驛覆陳仰祈聖鑒事竊奴才於光緒二十六年六月二十日寅時承准軍機大臣字寄六月十八日奉上諭富順奏山海關秦王島一帶地段空虛請調重兵以資防守各摺片津沽爲京師門戶地方尤關緊要宋慶馬玉崑所部各軍遂日與洋兵接仗無可抽撥訥欽所部七營本日已有旨諭令增祺轉飭該副都統卽率所部迅速赴關矣李春根喜所帶各營哨現在旣已到關卽著該副都統先行聯絡一氣扼要駐紮嚴密堵禦毋得稍有疎虞至海面喫緊應係實在情形著俟各省添調營伍陸續報到卽行酌量派撥赴關以厚兵力將此由六百里加緊諭令知之欽此遵旨寄信前來奴才欽遵之下感悚莫名當卽咨會奉軍統領李春及仁軍分統根喜督率所部營哨駐紮關城迤東之止錨灣海口嚴密堵禦以遏東路奴才現准統領直隸練軍貴州鎮遠鎮總兵楊玉書咨會奉直隸總督行知帶領馬隊四營步隊二營撥調來關楊玉書會商奴才督率所部六營分紮關城迤西之秦王島楊河口一帶海岸扼要堵禦以遏西路奴才會商同城文武並督飭協佐等官帶領八旗兵丁分布城上防守四門彈

歷街道綠營官兵以及鄉團鋪團分守東西羅城協守四門奴才卽與現有各軍聯絡一氣此期互相協助不敢稍有疎虞奴才現准盛京將軍增祺電知已電調仁軍總統訥欽迅赴山海關一帶除俟該軍全數到齊再行奏報並將派出防城官兵酌給津貼造具細冊咨送兵部察覈外所有恭奉廷諭欽遵辦理緣由理合恭摺由驛覆陳伏乞皇太后皇上聖鑒訓示謹奏光緒二十六年七月初三日奉硃批知道了著卽會商各軍聯絡一氣實力籌防欽此

(三九〇九)江西道監察御史鄭炳麟請特派大臣統兵摺

光緒二十六年七月初三日

江西道監察御史臣鄭炳麟跪奏爲各省援軍紛集請特簡統帥以一事權而顧全局恭摺仰祈聖鑒事竊甲午之役中日交綏我師敗績說者謂由於軍火之不利也士卒之未練也將領之不和也而不知實由於統帥之無人以致事權不一衆志不齊軍令不肅遂至潰敗不堪言狀方今各省外援及畿輔新募之兵陸續成軍者已逾百營而武衛各軍尙不在此數內若再統馭乏人散漫無紀恐蹈甲午覆轍而大局不堪設想矣願將才易帥才不易居今日而欲得帥才則尤不易霍去病曰顧方略何如耳不至學古兵法岳武穆曰運用之妙

在乎一心可知兵事爲儒學之至精虛者實之實者虛之非好謀不足以有成非出奇不足以制勝臣於上月十五日謹籌十策次及地雷聞甘軍試用兩次傷洋兵甚多高挂白旗降牌此足驗也惟有前四川總督李秉衡其聲名足以服衆其威望足以懾敵其公正無私足以信賞而必罰前中法之役在廣西布置我軍賴以大捷中日之戰在煙臺坐鎮敵人未敢深入其閱歷之久尤爲人所共知非臣一人之私言也請特簡李秉衡爲統帥俾全師歸其節制調遣以一事權再統率義和團同赴前敵以輔兵力之不足似於軍務大有裨益臣爲大局起見是否有當謹披瀝直陳伏祈皇太后皇上聖鑒謹奏光緒二十六年七月初三日

（三九一〇）山東道監察御史許祐身請派勁旅規復天津摺

光緒二十六年七月初三日

花翎三品銜山東道監察御史臣許祐身跪奏爲海疆要地擬請簡派勁軍亟圖恢復以遏敵鋒恭摺仰祈聖鑒事竊自大沽開戰以來兵端未弭現已征調各軍指日雲集洵足備禦不虞但宋慶一軍在北倉楊村一帶挖濠自守雖足以杜洋兵北竄之路而規復天津恐兵力尙嫌單薄臣愚以爲守於堂奧不若保其藩籬天津爲畿輔屏蔽勢在必爭目下洋人按兵不動乘其後隊尙未腐聚似宜速派勁軍尅期恢復甘肅提督董福祥勳威素著所部皆

百戰之師若使統帶全軍督率義和團衆兵民協力迅拔津城自足以奏膚功而寒敵膽外境既平則京師自固况現在禁衛森嚴且有武衛中軍駐紮所調各軍亦陸續漸至自不致於空虛以董軍移赴前敵攻堅奪隘兵氣倍揚宋軍近在北倉亦可進兵夾擊聯絡聲威於全局不無裨益臣愚昧之見是否有當謹恭摺具陳伏乞皇太后皇上聖鑒訓示謹奏光緒二十六年七月初三日

(三九一一)兩江總督劉坤一等請授李鴻章全權與各國電商藉探消息以間敵謀

摺

光緒二十六年七月初一日
光緒二十六年七月初四日到

兩江總督臣劉坤一湖廣總督臣張之洞等跪奏爲戰事方殷謹合詞敬陳管見以間敵謀而裨京防恭摺仰祈聖鑒事竊聞津郡不守敵勢益張該處距京僅止二百餘里上念皇太后皇上繼承宗社不知如何憂勞臣等遙望神京難安寢饋現聞東西洋續調之兵日本已有萬餘人在大沽登岸其餘各國兵隊啓行已久亦必相繼到津聞各國相約進兵現仍徵調不已事機日緊一日尤深焦急伏念兵端既開在我自無不戰而和之理臣等惟當振刷精神將一切戰守事宜趕緊次第籌辦嚴密布置無論何國來犯卽盡力遏勦斷不敢稍涉

疏懈自弛藩籬惟自古用兵之道本可操縱並行兩次伏讀致俄英日本及美德法六國書
囑令排難解紛仰見朝廷委曲求全苦心調劑仁至義盡薄海同欽現在俄日兩國已有復
書詞氣雖尙和平語意究難揣測大學士臣李鴻章周知四國體用兼通辦理交涉有年爲
各國所信服現已遵旨北上行抵上海第戰爭方亟航海旣難徑達遵陸又慮需時若旬日
以後洋兵已逼近京城局勢又變深恐緩不濟急可否籲懇天恩授以全權示以機宜飭令
就近在上海與各國電商藉探消息察其意向緩其進兵何國有隙可乘卽由何國入手總
以間敵謀紓國難安兩宮爲主此次戰事起於倉猝各路援兵均未齊集但能使敵氛稍鬆
卽可多增一日籌備多固一分戰守庶於緩兵之中益便設防之計於大局實有裨益是否
有當謹合詞恭摺由驛六百里加緊馳奏伏乞皇太后皇上聖鑒訓示謹奏光緒二十六年
七月初一日兩江總督臣劉坤一湖廣總督臣張之洞閩浙總督臣許應騤四川總督臣奎
俊福州將軍臣善聯成都將軍臣綽哈布署兩廣總督臣德壽署陝甘總督臣魏光燾浙江
巡撫臣劉樹堂安徽巡撫臣王之春山東巡撫臣袁世凱護理江蘇巡撫臣聶緝渠護理陝
西巡撫臣端方

(三九一二) 山東巡撫袁世凱據電代奏伍廷芳譯呈美國覆書摺

光緒二十六年七月初一日
光緒二十六年七月初四日到

山東巡撫臣袁世凱跪奏爲據電代奏恭摺仰祈聖鑒事竊臣於光緒二十六年七月初一日接准出使美國大臣伍廷芳電稱國書欽遵呈遞茲將外部齎送美總統覆書謹譯呈大美國大伯理璽天德問大清國大皇帝好奉光緒二十六年六月二十三日國書荷蒙大皇帝鑒察敝國願敦睦誼持平辦事之衷實深欣幸美國派兵在中國登岸原爲保衛使館保護寓華商民財產按照條約公法應享權利起見各國派兵亦同此意均經聲明閱惠書知中國亂匪騷擾戕害德使及日館書記圍困各使違旨作亂並疑貴國朝廷袒縱謹擬辦法切盼施行一願貴國將駐京各使臣現在情形宣示各國二立准各使臣與本國任便通信仍切實保護俾免驚險三諭飭各大員與各國兵官會商協救使館保護各國人民安靖地方倘蒙允行則此次擾亂各事不難與各國妥商了結各國如允敝國調停敝國樂爲貴國效勞敬布惻忱伏祈省覽西歷一千九百年七月二十三日請代奏前來除咨呈總理各國事務衙門外理合據電代奏伏乞皇太后皇上聖鑒訓示再此摺係由驛六百里加緊馳遞以期迅速合併聲明謹奏光緒二十六年七月初一日

(三九一二)附件一 袁世凱請飭總署籌商令各國使臣均發安電回國片

再查美國覆書較各國最爲和平辦法亦頗切實尙未迫我所難將來排難解紛似須由美國入手且駐京各國使臣惟美使有電回國該國即願任調停倘令各國使臣均發安電回國則願任調停者當不止一美國或可漸就範圍擬請飭下總理各國事務衙門王大臣妥籌商辦是否有當理合附片具陳伏乞聖鑒訓示謹奏

(三九一三)軍機處電寄李鴻章諭旨

光緒二十六年七月初四日
電寄檔

奉旨李鴻章電悉現在事機甚緊著仍遵前旨迅速北來毋再藉延欽此七月初四日

(三九一四)慶親王奕劻等擬致英使寶納樂函稿

光緒二十六年七月初七日
洋務檔

徑啓者昨日奉覆一緘曾聲明不致再有攻擊之事乃昨晚又有教民向官兵卡前開槍官兵傷亡二人當即放槍還擊始行停止似此教民不受管束恐其激成巨禍致誤大局應請貴大臣會商各國大臣嚴加約束免致因次生衅是爲至要惟近日頗聞教民廝聚太多其

意不願諸位大臣離京以冀永作護符謠傳固不足信如果實有此等情形想各國大臣必早覲破不致墮其術中也暫避一節昨有答書尙未接奉復音務希於兩三日內定期見示以便料理一切此布順頌日安慶親王等同啓七月初七日

(三九一五)上諭

光緒二十六年七月初八日
洋務檔

光緒二十六年七月初八日內閣奉上諭前因近畿民教滋事激成中外兵端各國使臣在京者理應一律保護迭經總理衙門王大臣致函慰問並以京城人心未靖防範難周與各使臣商議派兵護送前往天津暫避以免驚恐卽著大學士榮祿預行遴派妥實文武大員帶同得力兵隊俟該使臣定期何日出京沿途妥爲護送儻有匪徒窺伺搶掠情事卽行勦擊不得稍有疏虞各使臣未出京以前如有通信本國之處但係明電卽由總理各國事務衙門速爲辦理毋稍延擱用示朝廷懷柔遠人坦懷相與之至意欽此

(三九一六)大學士李鴻章等共籌補救之策摺

光緒二十六年七月初六日

太子太傅大學士臣李鴻章太子少保兩江總督臣劉坤一跪奏爲遵旨共籌補救恭摺覆

陳仰祈聖鑒事竊奉六月二十一日電寄諭旨朝廷誼重邦交仍不肯輕於決絕該將軍督撫查明各國洋商教士按照條約一體認真保護不得稍有疏虞至近日各處土匪亂民焚殺劫掠擾害良民尤屬不成事體著該督撫及各統兵大員相機勦辦以清亂源等因欽此又奉六月二十八日電寄諭旨朝廷本意原不欲輕開邊衅飭令嚴密籌備以防意外之變惟總不欲兵衅自我而開一面將坦懷相與之意宣示各國領事共籌補救之方以維大局等因欽此臣等遵將朝廷恩意向各國領事剴切宣示相與籌維各領事縷述北方起衅皆由亂兵與土匪合爲一氣仇教攻洋焚殺無忌外邦亦知非出聖意故各國復書祇求保使勦匪實際不難妥商了結惟近有數事甚不相符一駐京各使除康格通一電外他使並無安好信據寄函是按照國書保護使館恐不實也二近聞北方各軍沿途攻燬教堂殘殺教士教民多人東北各省焚殺教堂教士無數皆係官吏所爲是按照條約保護教士恐不實也似此情形各國調兵日多實難共籌補救等語臣等再三力解而無以示大信也聞俄因黑龍江起衅已派兵部尙書統兵來華不久各軍分路雲集兵薄京城共圖雪忿俄德尤爲狠毒詎肯留我餘步至其時臣等萬死何足塞責自古知幾尤貴爭先伏繹此次諭旨及各國往來國書要義擬請速定大計者四端一請明降諭旨飭大學士榮祿派文武大員帶兵

護送各使赴津以示寬大而泯疑愿各處沿途設道爲難該使等不欲冒險或先撤去仇攻之兵專派保護之兵優加體卹美廷電謂各使通信方易商辦應一函准其通信本國彼此停兵各派全權商議善後無論在京在津總須先釋使臣蓋停兵方能補救釋使方能停兵業已激成公憤若至變生不測恐使臣亦所不願挾制在所不受也一請明降諭旨各省督撫將軍以及入衛統兵各大員應卽懷遵六月廿一日諭旨各國洋商教士仍按照條約一體認真保護不得稍有疏忽並不得輕聽誤會縱容亂兵土匪藉端焚殺迭次被害之洋人教士及損失物產將來彙案撫卹賠償已屬不貲倘再任性逞一時之忿貽累國家伊于胡底一請明降諭旨各督撫及各統兵大員應卽懷遵六月廿一日諭旨各處土匪亂民焚殺劫掠擾害良民卽行相機勦辦近來匪徒倡亂託爲義民志在搶掠戕官劫獄目無法紀天津之戰擊斃甚夥屍橫遍野黠者可恨愚亦可憫各國悍兵所至必欲殺無遺類自將殃及無辜至各州縣會匪蠢動插盟結黨勒索殺掠四民輟業於餉項尤有關礙應請嚴飭無論何處土匪以及亂民散勇均卽認真勦辦以清內亂而弭外衅一請明降諭旨畿輔荒旱赤地千里民不聊生應請專派大員會同順天府尹直隸總督趕緊籌款廣施賑濟並請皇太后皇上賞撥帑銀漕米以賑爲撫俾脅從良民各歸本籍以上數條均卽仰懇俞允以符迭

次諭旨國書要義示以無欺庶期就範目前各國添兵以救使勦匪爲詞聲明天津之戰非與我國家開衅尙不致爲非常之禍若遲之又久而使臣不出土匪不靖其兵到齊遏之不止宮闕受驚官民荼毒且恐一國變其宗旨各國悍然不顧禍在眉睫莫可補救臣等冒死瀝陳是否有當伏乞皇太后皇上聖鑒訓示再此摺係臣鴻章主稿電囑臣世凱繕摺由驛六百里加緊馳遞以期迅速合併聲明謹奏光緒廿六年七月初八日奉硃批另爲旨欽此

(三九一七)上諭

光緒二十六年七月初八日
洋務處

光緒二十六年七月初八日內閣奉上諭前因中外釁端未弭各國商民教士之在華者本與兵事無涉諭令各督撫照常保護現在近畿大兵雲集各路統兵大員亦當仰體此意凡洋商教士均當設法保全以副朝廷懷柔遠人之意至教民亦國家赤子本無畛域可分惟自拳教肇釁以來該教民等多有盤踞村莊掘濠築壘抗拒官軍者此等跡同叛逆自不能不嚴加剿辦第念其究係迫於畏罪之心果能悔禍自新仍可網開一面昨據宋慶報稱寶抵縣大薄洵教民經該軍剴切曉諭該教士等均願呈繳軍械平圩填濠自行解散各就村屯居住是該教民等非盡甘心爲匪亦可概見所有各處教民如有感悔投誠者著該將弁

及該地方官一體照此辦理不得概加殺戮其各處匪徒假託義民尋仇刦殺者即著分別查明隨時懲辦以清亂源欽此

(三九一八)兩江總督劉坤一等奏軍情緊要請飭各省修護電綫以通消息摺

光緒二十六年七月初六日

兩江總督臣劉坤一湖廣總督臣張之洞山東巡撫臣袁世凱跪奏爲軍情緊要請飭各省修護電綫以通消息恭摺會陳仰祈聖鑒事竊維電綫之設速於置郵而當軍務孔熾之時尤關重要近自津郡失陷洋人馬隊四出游弋難保不擾我驛道阻我消息而土匪亂民無知妄作亦往往掘桿竊綫藉圖漁利現值北方用兵之際軍情瞬息千變惟賴電信無阻消息靈通方可協籌因應迅赴機宜相應請旨通飭各直省將軍督撫轉飭地方營汛文武員弁一體認真稽查實力巡護倘再有掘斷毀壞情事除勒限緝犯嚴辦外並將防範不力之文武員弁分別懲處以專責成再查直隸保定地方及山西陝西一路電綫關繫尤重而被毀尤多應請一併嚴飭各該省督撫飭屬查明地段將已毀者立即設法修復未毀者酌派兵弁嚴密保護務期節節通達音信靈捷庶於軍務時局均有裨益所有請飭各省修護電

線緣由是否有當謹合詞恭摺由驛六百里馳陳伏乞皇太后皇上聖鑒訓示謹奏光緒二十六年七月初九日奉硃批另有旨欽此

(三九一九)廣西巡撫黃槐森奏遵旨停解洋款聽候部撥移充軍餉並請統籌定局

以杜衅端摺

光緒二十六年六月二十二日

廣西巡撫臣黃槐森跪奏爲廣西認還洋款遵旨暫行停解聽候部撥移充軍餉並籲懇宸衷統籌定局以通商均利益以還款昭信義以停止傳教釋民怨而杜衅端恭摺馳驛密陳仰祈聖鑒事竊臣於光緒二十六年六月初八日具奏固本禦侮十三日覆奏聯團保疆土由驛馳陳各一摺片在案茲於六月十九日承准軍機大臣字寄光緒二十六年六月初四日奉上諭現在統籌戰備迭經飭令各直省籌餉練兵共保疆土惟庫款支絀餉項艱難既與外洋決裂所有各直省認還洋款著即暫行停解聽候部撥移充軍餉將此由六百里加緊諭令知之欽此遵旨寄信前來臣跪聆之下外洋旣爲決裂洋款僅著暫停仰見慈懷慮遠思深寓懷柔惠保至意凡屬臣庶欽戴莫名遵即恭錄行司遵照伏思外洋皆藉商務立國自沐朝廷恩施准其互市按洋貨入口值百稅五約計每年納稅二千數百萬兩彼售貨